

Mati, mati, mati. Sebutkan perkataan itu lagi dan kematian menjadi perkataan biasa. Remeh. Begitulah rutin harianku di arena ini. Kehijauan semulajadi berubah merah, hapak baunya. Melodi orchestra fauna ditenggelami ribut kekejaman manusia.

Namun hari ini bukan sebarang hari. Matahari mencurahkan sisa-sisa cahayanya yang menerobosi celah-celah dedaun. Awan gemawan kelabu lekas berarak dari ufuk timur lalu berkepuhan di langit. Senja merangkak tiba. Aku mencuri pandang sekeliling. Lembaga Harimau sudah siap, sudah bersedia. Ada yang berdiri terselindung di belakang pohon, ada yang bersebat dengan lumpur, ada juga yang terbaring samar-samar dengan warna rumput. Tapi yang menyamakan mereka adalah niat yang satu. Masing-masing memegang senjata yang dikhususkan baginya. Hembusan angin yang beransur deras mengelus-ngelus pipi, menggoyang-goyangkan rimbunan daun dan menyebabkan suatu bunyi gemersik yang mendayu-dayu. Selain itu, hutan rimba itu sepi bagaikan bisu tidak berbunyi. Sunyi termasuk makhluk-makhluk yang menghuni hutan itu. Semacam sedang menunggu menonton pertunjukan manusia yang bakal bermula.

Aku, Arai dan Wira menjeling ke arah Leftenan Adi. (Lt Adi.) Manik-manik peluh dari mukanya hempas ke bumi bagaikan seutas rantai bermanik yang terputus talinya. Kami cuma perlukan isyaratnya. Bila tiba masanya tapi musuh belum datang, kami boleh mengalihkan komittee masing-masing ke tempat rehat. Aku perhatikan mulut Lt Adi berkumat-kamit.

57:54.

57:55.

57:56.

Tiba-tiba Lt Adi tertoleh ke arah kirinya. Jantungku berdentak pantas. Aku memegang erat senjatakku sambil perlahan-lahan mengawasi keadaan sekelilingku.

Sekonyong-konyong ada pergerakan di semak-samun di hadapanku. Lt Adi merenung tajam ke arahku, dengan niat mengisyaratkan agar pergi lihat. Aku meneguk air liurku. Langkah demi langkah aku heretkan kaki. Terketar-ketar seluruh tubuhku. Belum apa-apa pun badanku bagaikan sudah diselimuti peluh. Sudah tibakah masanya? Daun-daun semakin besar pergerakannya. Aku mengerut dahi.

“Keluar kau!”

Aku mengacukan senjata ke sasaran berpotensi.

“Tunjukkan diri kalau berani!”

Terdengar bunyi-bunyi yang tidak diketahui. Dengan menutup mataku seerat-eratnya, aku menggoyangkan rimbunan!

“AHHHH!”

Terus kicauan unggas-unggas dengan kuatnya berdentuman di telinga dan aku dapat rasakan sayap-sayap halus menampar-nampar pipiku. Aku membuka mata. Burung rupanya. Lt Adi mencekak pinggang lalu menggeleng-gelengkan kepalanya. Aku cuma tersenyum kambing.

“Sudah. Sekarang dah jam 7.45 malam dan musuh tiada dalam lingkungan. Justeru saya ingin kamu bertiga mengalihkan sub-pasukan ke tempat rehat seperti dibincangkan kelmarin. Pastikan semua letakkan senjata di sudut yang sama dan bukan bertaburan tempat ,” getus Lt Adi.

Aku mengangguk tanda mengerti. Sedangku tuju ke pasukanku, seekor burung merpati yang hinggap di sebatang dahan melepaskan siulan, lalu terbang tinggi di langit. Bebas. Insan lain sudah bebas dari sangkar penghindar masing-masing. Semuanya sudah maju tinggi, tidak menghiraukan mereka yang ketinggalan. Tapi kita? Aku terdongak. Impian dan cita-cita waktu kecil mula terbentang di langit. Walaupun aku dianggap seorang

pengecut waktu kecil, aku telah membuktikan bahawa aku adalah satu-satunya orang yang masih berani lagi membawa logo Harimau yang terlekat pada lengan kananku. Masih berani lagi berimpian demi untuk orang kita. Walau apa jua, aku dan Lambang Harimau akan berlawan demi untuk kebebasan. Tidak ingin kulihat kami semua diinjak-injak. Dianggap kerdil. Kita tidak boleh ketinggalan. Kita juga perlu maju. Tiba-tiba Arai menepuk bahu, mengejutkan aku dari lamunan.

“Termenung lagi tu, rindu kat Sri Wan Sofia ke?” sindirnya.

Aku tersenyum. Sofia adalah tunang tersayangku. Aku ingat lagi masa pertama kali kutemuinya di klinik Wak Tanjong. Fia pada ketika itu sedang menguruskan luka-luka di lututku. Fia adalah satu-satunya wanita Melayu yang berintelek dan berpelajaran tinggi. Katanya ingin menjadi contoh bagi wanita-wanita Melayu di desa turut ikut jejaknya agar dapat sama-sama menyumbang pada tanah air. Walaupun seorang doktor, Fia selalu merendah diri dan masih taat pada budaya Melayu. Fia berbaju kurung biru dan bertudung putih pada saat itu. Manis dan ayu wajahnya. Suaranya begitu lunak, bicaranya sentiasa sopan dan beradab. Fia selalu memberikan nasihat-nasihat tentang kesihatan kepada orang kampung dan pesakit-pesakitnya. Fia bagaikan gadis Melayu terakhir yang ingin dimiliki semua. Kami yang sudah setahun bertunang berjanji akan naik pelamin setelah peperangan ini berakhir.

“Kau ingat lagi tak waktu kita orang kecik lagi?” aku menyoal Arai, “Kita janji boleh kahwin dengan gadis idaman hanya bila dah berjaya majukan Lambang Harimau? Kononnya nak jadi pahlawan dulu untuk pikat...”

Arai mengelip-ngelipkan matanya sambil mengganggu perlahan-lahan.

“...Cita-cita kita sampai sanggup nak tumpah darah untuk Lambang tercinta ini. Haha, tak sangka sampai hari ni kita masih kejar lagi cita-cita tu kan? Semuanya untuk mencerahkan masa depan Lambang Harimau... Kau rasa sekarang ada tak budak-budak simpan cita-cita macam kita waktu kecik?”

Arai teragak-agak sejenak lalu menggeleng kepala, “Entahlah. Aku pun tak tahu. Eh, dah lewat ni, jom pergi simpan senjata dulu!”

Selesai menghitung jumlah senjata, aku menjejak kaki ke kawasan rehat. Aku melihat anggota-anggota pasukanku. Ada yang meneguk air dengan pantas. Ada beberapa soldadu baharu yang membuat lawak sesama sendiri. Ketawa mereka membuatku tak jemu mengejar impian waktu kecilku. Dahulu, mereka semua tidak mengenali satu sama lain kerana datang dari segala pelusuk desa. Namun kini setelah lama menempuh cabaran bersama, mereka bagaikan isi dengan kuku. Aku bangga dengan mereka kerana mempunyai impian berani. Mereka sanggup menyertai Lambang Harimau demi untuk mempertahankan tanah ini bersama-sama.

Aku mencapai botolku. Aku mendongak ke angkasa sekali lagi. Setiap penjuru langit bagaikan dicat warna kemerah-merahan. Cuping telingaku jelas menangkap siulan burung. Mungkin sudah waktunya haiwan-haiwan di hutan ini bersap sedia menempuh malam. Khayalanku merantau jauh pada memori Warisan Harimau yang masih segar dalam ingatanku. Saat di mana aku tahu Lambang Harimau akan sehati dalam diriku. Ayahku pada ketika itu berlapang dada penuh bangga. Bangga akan anaknya yang kini mengambil alih tempatnya. Bukan hanya nama keluarga atau harta pusaka yang diturunkan daripada ayah. Bahkan tanggungjawab untuk melindungi keluarga dan tanah air diwarisi sama. Kini ayah sudah bersara, aku pula sudah bertunang. Senyuman menggayut-gayut di bibirku tatkala aku fikirkan tentang Sofia, ibu dan ayah di kampung. Teringin sekali aku bertemu dengan mereka.

“Musuh datang! Lt Adi cedera!” jerit seseorang.

Lamunanku serta-merta mati. Anak mataku meliar. Benarkah? Masakan musuh tahu tempat dan waktu rehat kami? Setahu aku, cuma empat orang sahaja yang tahu... Lantas kusuruh semuanya pergi mengambil senjata. Aku pun bergegas ke arah Lt Adi. Arai dan Wira sudah di situ. Wira sedang cuba merawat Lt Adi, yang tidak sedarkan diri. Aku

terperanjat bukan kepalang apabila melihat keadaannya. Dia tergeletak dalam kolam darah. Darah di dahinya merembes keluar. Kaki dan tangannya bagaikan dicekau kuat, calar balar. Aku melihat di sekelilingku. Tiada orang lain.

Sekonyong-konyong, suatu lembaga yang berbelang-belang hitam dan jingga mencerobohi kawasan kami. Kuperhatikan kukunya yang tajam pada tangan-tangannya yang memijak bumi. Tali jantungku bagaikan terputus melihat bengisnya lembaga itu. Tubuhnya sasar dan tegap. Matanya merenung kasar, penuh dendam. Harimau itu mengaum kuat. Jantungku bagai nak putus. Aku tidak tertahan mendengus-denguskan nafas. Aku menoleh ke arah Arai dan Wira.

“Aku rasa inilah musuh kita. Tiada orang lain selain kita yang tahu waktu dan lokasi rehat kita. Musuh manusia mana mungkin serang kita pada waktu begini?” Arai cuba membisik.

“Betul juga kata kau itu. Tengok luka-luka pada Lt Adi, macam diserang harimau! Dah sah dah, ini memang musuh kita! Arai, tembak dia Arai! Tunjukkan kemahiran kau menembak!” ujarku.

Arai tersenyum. Lelaki ego itu mengangkat senjatanya lalu diacukan ke kepala harimau. Tubuhku sekadar menggeletar kehairahan. Jari Arai sedia ingin menarik pistolnya. Semuanya beres. Namun harimau itu masih diam di posisinya. Aku rasa ada yang tak kena. Aku menoleh ke kananku.

“Nanti dulu! Bukankah harimau itu lambang kita? Kenapa nak tembak? Tengok logo Harimau yang sedang kau pakai,” herdikku sebelum Arai sempat menembak. Jariku menunjuk kepada lengan kanan Arai, tapi.... Aku terkejut.

“Mana...logo kau? Kenapa lengan kau terkoyak? Kenapa sekarang...Lambang... Naga?”

Arai tertawa sinis. Dia meludah ke bumi. Kini dia mengarahkan pistolnya ke arahku. Aku tercegat lemah. Pandanganku cuma pada Arai. Arai? Inikah sahabat baikku? Kawan yang aku kenali sejak kami berlampin lagi? Kawan yang berkongsi impian bersamaku sejak kecil lagi? Mata Arai kasar memulangkan renunganku.

“Apa dah jadi dengan kau...” aku mampu berbisik kecil, “Kita kan berpakat nak lindungi Lam-”

“Lambang Harimau, Lambang Harimau! Aku dah bosan dengan Lambang Harimau! Setiap kali kita cuba majukan orang kota kita yang malas berfikir, kita gagal! Setiap kali kita keluarkan duit dari kocek sendiri untuk berikan pelajaran percuma kepada orang kita, mereka ponteng. Buang duit aje! Setiap kali kita cuba bentukkan askar-askar untuk jadi pejuang pengganti kita, mereka mudah menyerah kalah sewaktu latihan. Sekarang, kita kena lindungi mereka dari bahaya pula? Impian kita dah gagal, Qil. Gagal, gagal, gagal. Aqil, kau tak nampak lagi ke? Kita dah lama gagal...”

“Dan sebab kegagalan tu kau sanggup berpihak pada Naga? Kau dah lupa ke, kau ni salah satu ketua Lambang Harimau? Kau sanggup gadai maruah, buang tanggungjawab dan tikam dari belakang...sebab kau rasa kau dah gagal?”

“Naga lebih berkuasa. Naga lebih kaya. Naga mampu membayarku lima kali ganda! Kau jangan berlagak berani wahai Si pengecut! Mari ikut aku!”

“TAPI NAGA PERMAINKAN KAU! Kau cuma dipergunakan sebab kau tak yakin dengan lambang kita. Kau-”

Tiba-tiba bunyi burung bersiul. Aku menoleh ke kiri. Musuh sebenar merangkak maju. Rupa-rupanya kami sudah dikepung sejak tadi lagi. Pasukanku menjadi huru-hara. Tidak bersedia. Askar-askar musuh menembak sasaran. Anak buahku gugur satu persatu.

Ketua Naga menghampiri kami berdua. Pistol Arai masih diacukan kepadaku. Ketua Naga tersenyum puas.

“Terima kasih, Arai. Sekarang kau boleh pergi,” arahnya.

“Bagaimana dengan bayaranku?”

“Oh, ya. Ni bayaran kau.” Ketua Naga dengan cepat menusuk pisau ke perut Arai. Aku tampak Arai muntah darah. Dia rebah ke bumi. Tubuhnya kaku bermandi darah. Sinar di mukanya lenyap. Matanya pudar.

**BANGSAT!!!**

Tiba-tiba harimau yang duduk sejak tadi mengaum kuat lalu menyerang ketua Naga. Ia mencekai ketua Naga. Ketua Naga kelam-kabut cuba mengeluarkan pistolnya lalu diacukan kepada harimau...Tidak! Inilah saatnya aku dipertanggungjawabkan. Lindung Si Harimau! Aku memberi tendangan tepat pada tangannya.

**BANG!** Tembakan-tembakan terlepas serentak. Aku menoleh ke kanan. Wira menjatuhkan tangan yang menggenggam senapang.

“Wira?? Kau??”

Butir-butir mutiara bertakung di kelopak mataku. Darah Melayuku menitis dari pinggang ke tanah. Aku jatuh melutut. Harimau menyembam bumi.

Jantungku berdetak lemah. Darah keluar membuak-buak.

Sedetik...Bayangan Sri Wan Sofia tersenyum anggun, merenung mataku dengan penuh kasih sayang sementara sinaran permata di jari manis perlahan-lahan menjadi pudar.

Sedetik... Kini pula ayahku berada di hadapan mata, menyerahkanku keris Warisan Harimau dengan bangga sambil menepuk-nepuk bahu.

Sedetik...Mindaku terarah ke zaman waktu kecil di mana lahirnya cita-citaku untuk menegakkan hak tanahair Lambang Harimau bersama Arai...

Sedetik... bangsa, nusa, agama, negara...

Sedetik...Aku teringat ejekan anak-anak kampung waktu kucecil...

Pengecut...pengecut.. pengecut..pengecut...

Tanganku cuba mencapai tangan Arai yang sudah kaku di sebelahku. Tawa Ketua Naga dan Wira kedengaran. Aku mengerling seujur tubuh si harimau yang gugur. Matanya masih bergerak merenungku. Aku meraba pisau yang terselit di pergelangan kakiku. Kutarik nafas yang dalam...

“Biar Putih Tulang jangan Putih Mata!!!!”

(1722)